

Enkarselashon òf Restitushon?

Kriminalidat ketu bai ta eskalá na nos islanan. Nos ta biba ku miedu di kiebro i ladronisia diariamente. Un atrako ta sigui pa un otro. Tirotéo i asinano ku frekuensia ta yena e páginanan di nos korantnan.

Kriminalidat ta un tóipiko papiá tur kamina. Nos ta fadá! Nos ke akshon! Nos ke kambio!

I nos ta mira algun kambio tuma lugá. Polis desididu a solushoná diferent kaso na Kòrsou. Nan a kolektá armanan di kandela, dunando aviso ku nan lo tuma medida pisá kontra esnan ku keda ku arma den nan poseshon. I na nos isla, diferente grupo gubernamental i sosial a dediká un dia pa trata e topiko di kriminalidat siman pasá.

Un pregunta ku ta bin dilanti den deskushonnan tokante kriminalidat ta e efektividat di enkarselashon komo un medio di kastigu. Ku tantu delitunan, no ta di sorpresa si nos prizonnan ta yen. Algun hende ta boga pa konstruí prizonnan mas grandi ku por hospedá mas residente. Ma di unda nos lo haña sèn pa un proyekto asina? Otronan ta sigurá nos ku e ruta di resosialisashon lo ta efektivu. Ma mas ku un malechor a kometé krimennan horibel inmediatamente despues di wòrdu "resosialisá." Di berdat ta Kristo so ku por resosialisá, dor di kambia kurason di e delinkuente.

Ta interesante ku Palabra di Dios no ta promové ni enkarselashon ni resosialisashon komo medionan pa trata ku kriminalidat. Alkontrario Beibel ta papia di ehekushon pa sierto krimen i restitushon pa otro delitu.

No tin espasio aki pa trata ku ehekushon. Si nos no ta despuesto pa aseptá ehekushon komo un kastigu faktibel, anto sin duda prizon ta e lugá apropiá pa esnan ku ta kometé krimen violento, manera matamentu, violashon, sekuestro, atrako, èts. Esnan ku ta kometé e krimennan aki ta peligroso i no mester tin libertat pa kana riba nos kayanan.

Ma ta nesesario pa pone hende ku a kometé krimennan no violento tras di trali? Nò! Ora ta trata di ladronisia, vandalismo, djòiraid, èts., restitushon (pa kompensá pa e pèrdida òf daño material) lo ta un metodo muchu mas efektivu. Esaki por sosodé PAFO di prizon.

Beibel ta deklará masha kla ku un ladron mester kompensá pa su ofensa i ta spesifiká kuantu e mester paga. Segun Exodo 22:1-7, si un ladron hòrta un bestia i mat'e, e lo mester paga e doño 4 òf 5 bes e balor di e bestia. Pues, si e kabritu tin balor di fl. 75, e ladron lo mester paga e kabritu su doño fl. 300. I asta si e doño ta haña su kabritu bèk bibu, segun Beibel, e malechor lo mester paga dòbel e kabritu su balor. Otro Skritura (Numbernan 5:5-8) ta indiká ku un ladron mester debilbé loke el a hòrta, plùs paga 20% adishonal.

Pa algun krimen kisas lo ta mas apropiá pa hues sentensia e malechor pa hasi 2.000 ora di trabou gratis den barionan ku tin sierto nesesidat òf sirbi hende ku tin mester.

Restitushon por ta muchu mas efektivu ku enkarselashon pa varios motibu. 1) E víktima ta kompensá. Enkarselashon no ta hasi esaki. Di berdat, hopi bes e víktima ta lubidá por kompleto den e proseso hurídiko. Restitutshon por yuda sana e heridanan kousá pa e krimen. 2) Restitushon ta benefisiá e malechor. Na lugá di sinta tras di trali ku nada di hasi, restitushon ta konsientis'e di su maldat i tambe ta dun'e un oportunitat pa hasi algu positivo pa rektifiká e daño ku el a kousa. Ademas, no ta un sekreto ku prizon ta un skol unda kriminalnan i ta influensia otronan pa sigui nan pasonan. Un hóben ku a kometé un delitu, influensia pa su mal amigunan, por sali for di prizon bon prepará pa un bida di krimen. 3) Restitushon ta menos kostoso ku enkarselashon. Un sentensia den prizon ta kosta hopi plaka; plaka pa konstruí e prizon i plaka pa kubri e gastunan di e estadia di e huésped.

Kriminalidat tin nos tur preokupá. Nos mester trata ku krimen na un manera hustu. Nos mester tin un sistema ku no ta lubidá e víktima inosente, ma tambe un sistema ku ta yuda e malechor. Si nos adoptá restitushon komo un medio pa trata ku krimen, esei por yuda solushoná nos krisis di kriminalidat.